



KEMENTERIAN PEMBANGUNAN WANITA,
KELUARGA DAN MASYARAKAT

SIARAN MEDIA

WANITA WAJA NEGARA SEJAHTERA

TEMA SAMBUTAN HARI WANITA KEBANGSAAN 2020

Bersesuaian dengan semangat waja dan pengorbanan golongan wanita, 'Wanita Waja Negara Sejahtera' telah dipilih sebagai tema bagi Sambutan Hari Wanita Kebangsaan (HWK) tahun 2020. Tema ini dipilih bagi memberi inspirasi kepada golongan wanita selain meningkatkan kesedaran masyarakat mengenai peranan dan keupayaan kaum wanita dalam pembentukan keluarga, perpaduan dan pembangunan masyarakat dan negara.

Dalam memacu Malaysia untuk mencapai status negara maju yang dihormati di mata dunia, golongan wanita harus mengorak langkah aktif untuk sama-sama memastikan Malaysia berada di landasan yang kukuh menuju ke persada yang lebih tinggi dan terhormat.

Menyedari besarnya peranan wanita dalam pembangunan negara baik dari segi ekonomi dan kesejahteraan negara, Kementerian Pembangunan Wanita, Keluarga dan Masyarakat (KPWKM) menyeru masyarakat Malaysia untuk bersama-sama bergerak dan menyokong usaha Kerajaan dalam memperkasakan wanita melalui pelbagai pendekatan. Antaranya adalah memperbanyakkan lagi program pembangunan kapasiti untuk menggilap potensi wanita dan menyediakan lebih banyak peluang untuk wanita mengisi jawatan sebagai pembuat keputusan.

Dari segi pembangunan keluarga pula, meningkatkan kefahaman tentang pentingnya peranan lelaki dan wanita untuk bersama-sama menguruskan rumah tangga dan menggandakan advokasi dalam mempromosikan hak-hak wanita agar mereka berani tampil melaporkan kepada pihak berkuasa mengenai kejadian yang tidak diingini seperti gangguan seksual.

Sambutan pada kali ini adalah bagi menghargai jasa dan pengorbanan wanita sepanjang usaha memutuskan penularan wabak Pandemik Covid-19, sama ada penglibatan secara langsung sebagai barisan hadapan mahupun tanggungjawab yang mereka di dalam institusi keluarga sepanjang tempoh Perintah Kawalan Pergerakan (PKP). Wanita juga menjadi tonggak kepada kejayaan ke atas pematuhan PKP yang telah dilaksanakan.

**Unit Komunikasi Korporat
Kementerian Pembangunan Wanita, Keluarga dan Masyarakat
24 Ogos 2020**